

# 說菩薩墮頂與學

智 銘

慧命舍利弗問須菩提：「云何爲菩薩摩訶薩墮頂？」

須菩提言：「菩薩摩訶薩，不以方便行六波羅蜜，入空、無相、無作三昧，不墮聲聞、辟支佛地，亦不入菩薩位，是名菩薩摩訶薩法愛生，故墮頂。」

舍利弗問：「云何名菩薩生？」

須菩提答：「生名法愛。」

舍利弗言：「何等法愛？」

須菩提答：「菩薩摩訶薩行般若波羅蜜，色是空，愛念著，受、想、行、識空，受念著。是名菩薩摩訶薩順道法愛生。復次，菩薩摩訶薩，色是無常，受念著，受、想、行、識無相，愛念著；色是無作，受念著，受、想、行、識無作，受念著。色是寂滅，受念著，受、想、行、識寂滅，受念著；色是無常乃至識，色是苦乃至識，色是無我乃至識，受念著，是爲菩薩順道法愛生。是苦應知，集應斷，盡應證，道應修；是垢法，是淨法；是應近，是不應近；是菩薩所應行，是非菩薩所應行；是菩薩道，是菩薩學，是非菩薩道，是非菩薩學；是菩薩檀波羅蜜，乃至般若波羅蜜，是非菩薩檀波羅蜜，乃至般若波羅蜜；是菩薩方便，是

非菩薩方便，是菩薩熟，是非菩薩熟。菩薩摩訶薩行般若波羅蜜，是諸法受念著，是爲菩薩摩訶薩順道法愛生。」

行不貪善根故，愛等諸結使薄，深入禪定；行不瞋善根故，瞋等諸結使薄，深入慈悲心；行不癡善根故，無明等諸結使薄，深入般若波羅蜜。

法愛，於無法生忍中，無有利益，故名曰生；菩薩初發心時，貪愛法食，所謂無方便行諸善法，深心繫著於無生法忍，是則爲生、爲病；以著法愛故，於不生不滅亦愛；譬如必死之人，雖加諸藥，藥反成病；是菩薩於畢竟空，不生不滅法忍中生愛著，反爲其患。

法愛於人天中爲妙，於無生法忍爲累。一切法中憶想分別，諸觀是非，隨法而愛，是名爲生，不任盛諸法實相水；與生相違，是名菩薩熟。

於柔順忍、無生忍中間所有法，名爲頂；住是頂，上直趣佛道，不復畏墮。譬如聲聞法中煖、忍中間，名爲頂法，垂近應得而失者，名爲墮。得頂者，智慧安隱，則不畏墮；譬如上山，既得到頂，則不畏墮；未到之間，側危畏墮。頂增長堅固，名爲菩

薩位。入是位中，一切結使，一切魔民，不能動搖，亦名無生法忍，所以者何？異於生故；愛等結使，雜諸善法，名爲生。又無諸法實相智慧火，故名爲生。有諸法實相智慧火，故名爲熟。是人能信受諸法智慧實相，故名爲熟。是故，依止生滅智慧，故得離顛倒，離生滅智慧故不生不滅。是名無生法忍；能信、能受、能持故，名爲忍。拔一切無常等諸觀法，名爲位。若不如是者，是爲順道法愛生。

舍利弗問：「云何名菩薩摩訶薩無生？」

須菩提答：「菩薩摩訶薩行般若波羅密時，內空中不見外空，外空中不見內空，乃至無法有法空中不見有法空。菩薩摩訶薩行般若波羅蜜，得入菩薩位。菩薩摩訶薩欲學般若波羅蜜，應如是學：不念色、受、想、行、識，不念眼乃至意，不念色乃至法；不念檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜；乃至十八不共法。菩薩摩訶薩行般若波羅蜜，菩提心不應念，不應高；無等等心不應念，不應高；大心不應念，不應高。何以故？是心非心，心相常淨故。」

舍利弗問：「云何名心相常淨？」

須菩提言：「若菩薩知是心相，與淫、怒、癡不合不離；諸塵、流、縛等諸結使，一切煩惱，不合不離；聲聞、辟支佛心，不合不離。是名菩薩心相常淨。」

舍利弗問：「有是無心相不？」

須菩提言：「無心相中，有心相無心相不可得。若不可得，不應問有是心非心不！」

舍利弗問：「何等是無心相？」

須菩提言：「諸法不壞不分別，是名無心相。若能知心相不壞不分別，是菩薩亦能知色，乃至佛道不壞不分別。」

所謂「內空中不見外空，外空中不見內空」者，有人言：外之大飲食入身中，故名爲內，若身死還爲外。一切法無來無去故，外空不在內空中。餘十七空亦如是，不生不滅無異相，無來去故，各各中不住，復次，菩薩位相，不念一切色爲有，乃至十八不共法，亦不念是有。

所謂菩提心，無等等心，大心者：菩薩初發心，緣無上道，我當作佛，是名菩提心，無等等名爲佛，所以者何？一切衆生、一切法，無與等者，是菩提心與佛相似，所以者何？因似果故，是名無等等心；是心無事不行，不求恩惠，深因決定。復次，檀、尸波羅蜜，是名菩提心。所以者何？檀波羅蜜因緣故，得大富無所乏少；尸波羅蜜因緣故，出三惡道，人天中尊貴；住二波羅蜜果報力故，安定能成大事，是名菩提心。

羼提、毗梨耶波羅密相，於衆生中現奇特事，所謂人來割肉出髓，如截樹木，而慈念怨家，血化爲乳；是心似如佛心，於十方六道中，一一衆生，皆以深心濟度；又知諸法畢竟空，而以大悲能行諸行，是爲奇特。如是等精進波羅蜜力勢，與無等相似，是名無等等。入禪定、行四無量心，徧滿十方、與大悲、方便合故，拔一切衆生苦；又諸法實相，滅一切觀，諸語言斷，而不墮斷滅中，是名大心，復次，初發心是名菩提心，行六波羅蜜無等等心，入方便心中，是名大心。如是等各有差別。

菩薩得如是大智，心亦不高，心相常清淨故，如虛空相常清淨，煙雲塵霧，做來覆蔽不淨；心亦如是，常自清淨，無明等諸煩惱客來覆蔽故，以爲不淨。除去煩惱，如本清淨，行者功夫微薄，此清淨非汝所作，不應自高，不應念，何以故。畢竟空故。

菩薩發阿耨多羅三藐三菩提心，深入深着故；雖聞心畢竟空常清淨，猶憶想分別，取是無心相；是無心相，爲有、爲無？若有，云何言無心相？若無，何以讚歎是無等等心當成佛道？殊不知無心相中，畢竟清淨，有、無不可得。無心相者，畢竟空，一切諸法無分別，是名無心相。

心相不壞不分別，諸法亦如是，阿耨多羅三藐三菩提，亦如虛空，無壞無分別。諸菩薩深著阿耨多羅三藐三菩提故，作是念：諸凡夫法，可言虛誑，以不真實故；菩薩漏未盡故，亦可言不清淨，云何阿耨多羅三藐三菩提亦復虛誑？須菩提爲解此疑，以是故說：阿耨多羅三藐三菩提雖是第一，亦從虛誑法邊生，故亦是空。不壞不分別相。以是故，行者當隨阿耨多羅三藐三菩提相行，不應取相自高。